

東
華
續
錄

東華續錄

同治七十

臣王先謙敬編

臣張式恭恭校

二月己卯朔諭軍機大臣等官文奏賊匪屢圖北竄見籌布置情形並官軍馳抵張登鎮各摺片賊匪意在北趨雖被官軍進逼展轉奔竄仍復伺隙北擾官文意在攔截北面俟南路諸軍齊到再圖圍剿聚殲惟見到各路官軍已不爲少若再不乘勢痛剿力挫兇鋒將來賊眾裹脅愈多且難保不聲東擊西伺隙他竄潘鼎新程文炳兩軍甫經趕到著卽在北面穩紮以固京畿門戶藉可暫事休息其餘張曜宋慶劉松山郭寶昌喜昌等軍著官文催令分路進攻務須由北向南節節壓剿以期痛殲醜類潘鼎新程文炳兩軍俟休息稍定後再行陸續相機進擊不可徒事株守賊匪見

向東南張登鎮竄逸著官文嚴飭派出追軍速行痛剿丁寶楨當由東北兩面穩慎進取合力夾攻以剿爲防楊飛熊一軍前據丁寶楨奏稱調赴河間著卽飭令扼要駐紮以杜賊竄天津之路山東所調吉林黑龍江丹丁前據該撫奏稱二月初旬可期練熟馬匹亦可調養臆壯著卽調赴直隸進剿以資厚集左宗棠著由西南一路趕緊進攻以期兜裹嚴密賊匪北竄不遂勢必東趨天津崇厚當嚴行布置以備防剿毋稍疏虞前經諭令陳國瑞會合張曜等軍剿賊茲據官文奏該侍衛已有新募勇隊自係兵數不敷著卽飭令招募勇丁二三千名務須精壯可靠毋以冒濫充數並著官文妥爲駕馭以收其用將此由六百里各諭令知之○庚辰李鴻章奏潘鼎新督率所部於正月十八九日由東阿渡黃善慶溫德勒克西於二十日渡黃唐仁廉馬勇於二十一日渡黃相機

北發潘鼎新二十日馳抵德州探聞賊由保定南竄饒陽恐其久踞肆擾或東竄河間天津因督隊倍道遄征二十一日過直隸景州二十二日抵阜城卽改由獻縣西趨饒陽臣因該藩司隊伍稍單飛飭善慶溫德勒克西唐仁廉等馬隊迅速前進會合兜剿旋接潘鼎新二十三日獻縣來函云途遇東軍王心安潰勇紛紛回獻詢知該軍二十二日在饒陽接仗挫衄賊營仍在饒陽一帶該軍卽趕前攔擊等語善慶等二十三日抵德州已率所部前往大約二十五六日方能與鼎軍會合唐仁廉二十五日續抵德州據稱沿途麋料難購馬力疲乏計潘鼎新日內必有戰事若馬隊各營趕上馬步相輔或可稍挫賊鋒殊深焦盼聞劉松山郭寶昌兩軍已偪饒陽北面該逆疊陷祁饒兩城其餒漸熾各軍須穩慎進戰此擊彼應先得一二勝仗再厚集其勢與之角逐卽難就地殲

除必將窮奔出境若以無制之師單弱之隊輕爲嘗試挫敗旣易賊氣立張故兵家慎言戰以戰而必不勝不如不戰養威揜極狡悍張總愚尤窮寇死黨非戰勝不足以塞其膽非久戰屢勝之軍則人馬器械徒以餉賊臣所知者劉松山湘軍打仗甚穩郭寶昌皖軍進隊尙猛屢據該提鎮稟報遠役久追人馬飢困恐尙不足大戰豫軍宋慶張曜勇隊皆籍隸潁亳熟悉捻情當不至挫見經官文相機調度諒臻妥協臣軍疲憊之餘又勇丁多係南人一渡黃河水土食物俱不相習此次奉調北來將領迫於大義勉力進行而勇夫無知竊聞北地荒旱缺糧間多逃走臣惟督同諸將設法激勸隨時募補體恤其艱苦冀得用其死力再臣所調周盛波一軍迄今未到臣卽自帶小隊先行啟程由東阿過黃河順道至張秋運河口察看後路糧餉軍火轉運事宜兼候盛軍取齊昨已

督飭委員籌辦黃運交匯淤阻之處在張秋設立轉運局以通南北餉道周盛波督押後隊先令其弟周盛傳率所部北行頃已趕到張秋臣卽日督率啟行由東昌至德州再察賊情如已南趨或進駐冀州大名一帶如賊尙趨東北視何處糧草最便暫行屯紮就近調度直境兵馬過眾糧草不給此最可憂屢次商請署督臣官文豫籌速辦頃准函覆已令各地方官籌款購備並因張樹聲派充行營翼長難遽分身另委候補知府張光藻赴河閒一帶隨營照料嚮導或可無誤軍食郭松林楊鼎勳大隊在濟甯整頓軍裝深恐過河後直東糧草艱絀難資飽騰臣又飛催陸續進征據報於二十七八等日分起北行黃河渡船稀少若無阻滯二月初旬可到該軍過河後察看賊趨何路再向何路兜剿途次疊奉諭旨敬悉北路防軍已厚無虞擬走下懷曷勝欽慰臣軍自由東

南相機夾擊以取犄角之勢雖賊勢剽疾直境平垣千里無高山大川以扼之兵勇雖多仍慮不敷且強弱不齊殊未易言聚殲此實在之情理不敢大言以取咎戾也又奏頃據潘鼎新稟稱二十四日行抵饒陽城東十餘里遇賊邊馬奔竄我軍趕緊追逐適皖軍郭寶昌程文炳自西北來會兵勢較盛賊盡敗竄西南各軍分路兜追三十餘里天晚收隊敗賊已趨深州一帶次晨該藩司仍約會皖軍探蹤追擊等情臣查東北各軍雲集賊知不可深入勢將南趨順廣或循舊路回竄彰衛或乘虛東擾臨清東昌均未可定臣止由張秋北行雖後隊未齊可爲東西聊作聲援俟過東昌後察探賊蹤所向再定進止一面飛催郭松林楊鼎勳等倍道趨行計其渡河尙需旬日卽令徑趨東昌大名一帶攔剿仍飛飭潘鼎新善慶等由東北壓追而下惟直境西南地勢尤極寬平無險

可阻李鶴年在磁州兵力甚單似亦難於堵遏臣懸揣局勢惟懷慶衛輝北阻太行南偏黃河地形較狹似可設法圍圍若左宗棠等趕派數軍嚴扼澤潞各山口及垣曲來路使其無可竄遁各軍由東北節節兜追過廣平大名後或分紮漳衛各河或進扼懷慶之沁河機局更緊再派隊蹙之一隅仍仿照上年扼賊運東之法稍需時日冀收聚殲之效於大局亦無妨礙如不求圍賊之地似難有殄滅之期是否有當伏乞 聖明嚴飭各省將帥秉公合力籌商屆時妥細察辦賊情無定而地勢有定如在直晉圍剿似較得力成否雖未敢豫知或亦因地制宜之法 上諭軍機大臣等潘鼎新等軍昨據官文奏稱距張登鎮不遠諭令在北路扼紮以資休息李鴻章所稱該藩司等徑趨饒陽自係在官文奏報以前之事該藩司等跋涉遠來誠不宜輕於浪戰著仍遵前諭暫在北

路堵扼以杜捻蹤北竄李鴻章見由東阿渡黃卽著相機前進周盛波各軍並著催提北上以厚兵力李鴻章抵直後卽可在東南一面擇要扼紮如兵力有餘並著分撥數軍馳赴東北會合丁寶楨崇厚各軍向西南壓擊見在丁寶楨駐紮任邱一帶卽著和衷商酌妥爲布置當此事機孔亟宵旰焦勞該督撫等俱朝廷所委任當思師克在和之義協力同心迅籌滅賊儘因意見參商致誤事機其何顏以對君民耶李鴻章因直隸地勢平衍擬蹙之於懷衛設法圍制固屬因地制宜惟見聞該逆由祁州竄至安州復至高陽肆擾勢仍北趨似未知畏威南竄若不痛加擊剿恐裹脅日多必致盤踞近畿劉松山等軍著官文仍遵前旨飭令由北面壓剿而南若得一二勝仗則軍威大振足懾逆膽儻日久遷延師老餉缺愈形棘手其郭松林楊鼎勳等軍應否飭令徑趨東昌大名

一帶著李鴻章相機調派所有淮軍糧草著官文嚴飭各屬妥爲備辦毋使缺乏左宗棠行抵何處著卽相機前進妥爲調度並著與李鴻章隨時籌商方略共奏膚功天津爲富庶之區地廣人眾逆匪垂涎實在意中著崇厚懍遵前諭妥爲防剿並著與丁寶楨各軍聯絡聲勢扼截毋使闖入是爲至要神機營奏陳國瑞募勇成隊酌給餉銀三萬兩以供支放著官文傳諭該侍衛祇領後撥節動用此係格外體恤該侍衛當奮勉勦賊以圖報稱不得徒託空言神機營餉項豈能時時撥給嗣後如有缺乏著官文隨時支發毋稍貽誤本日據侍郎畢道遠奏陳國瑞勦賊奮勇堪派左宗棠翼長等語陳國瑞本係交左宗棠差遣其可否派充翼長著左宗棠察看儘因該侍衛性情與充當翼長不甚相宜或另派妥員或不派員之處均著該大臣酌覈辦理將此由六百里各諭令

知之○諭沈葆楨奏報造船開工日期並陳明船廠情形一摺據稱開造輪船鐵廠關繫最重上年十二月間船臺造成一座所運鐵器木料亦已附舶而來當親率在事官紳工匠前赴船塢開工相機酌辦惟需石需木需土需匠四者頗難所奏均中竊要輪船一事所難在於經始見在鳩庀已有可觀尤當矢以實心實力期於必成卽著沈葆楨督飭周開錫等及日意格各員盡心經理毋以畏難自阻庶日新月異共觀厥成其巡察布置一切均著照該前撫所議辦理沈葆楨以本地紳士督辦船政事非易爲英桂馬新貽李福泰卞寶第務當遇事籌商並將經費隨時撥給俾得一無牽掣克肅要工將此由四百里各諭令知之○諭曾璧光奏籌辦獨山荔波軍務情形請在重慶設立捐局並請調馬宗駿等員各摺片荔波獨山逆匪恃眾負隅曾璧光以餉絀兵單未能迅圖

大舉惟該州縣係黔粵往來孔道且距省甚近匪徒蹂躪已久若不力籌進剿勢將益肆蔓延著曾璧光檄飭黃清源李泉源等軍就見有兵力設法進規相機布置黔省餉需萬分缺乏曾璧光擬援照湖南貴州見在辦捐章程在川勸捐著卽照該署撫所請在重慶府城設立四川協黔新捐總局由曾璧光派員前往勸辦並著崇實飭令川東道暨各地方官協同經理所收捐款仍由曾璧光咨明四川總督儘數劃抵川省積欠黔餉以裕軍儲四川副將馬宗駿湖南沅州協都司田國珍據曾璧光奏稱均屬熟習軍事著崇實劉岷飭令各該員迅速赴黔交曾璧光差遣委用其黃清源李泉源滕代榮三員並准曾璧光畱於黔省以資差委將此由五百里各諭令知之○辛巳諭軍機大臣等張之萬奏派兵入直助剿一摺張之萬以直省軍務緊要擬挑選步勇三四千名馬勇

兩營派令姚廣武張從龍王文行王得勝督帶赴直協剿寬奏具見惻忱前有旨諭令英翰督率皖軍嚴扼黃河南北兩岸與李鶴年聯絡聲勢互相截剿此次張之萬所派馬步各軍卽著飭令前赴豫省歸英翰節制調遣該軍到豫後應如何擇要扼紮之處並著英翰與李鶴年妥籌布置豫省既添此軍防剿兵力較厚如賊蹤竄近西南著左宗棠會商李鶴年英翰相機調度賊匪見仍北趨祁定高陽一帶朝廷甚深塵繫左宗棠當懷遵疊次諭旨星馳前進迅掃逆氛以副委任王可陞所部四營卽著張之萬檄飭駐紮清淮一帶以資彈壓將此由六百里各諭令知之○諭穆圖善奏官軍攻克渭源見籌進剿狄道河州一摺甘肅渭源縣久經回匪竄踞穆圖善派知府舒之翰會同提督王得勝傅先宗等由鞏昌進剿直薄城下合力衝殺斃匪甚多賊向官堡奔竄當將縣城

收復勦辦尙爲得手惟官堡爲狄道咽喉該逆大股尙踞其中亟應乘勝攻克以便節節進兵著穆圖善迅飭各軍立將官堡賊巢掃蕩以次進規狄道河州該署督卽相機出省督勦迅殄逆氛將此由六百里諭令知之○壬午諭軍機大臣等丁寶楨奏捻逆折竄西北分路扼剿挑派吉林等西丹馬隊赴直崇厚奏賊氛北偏會兵力邊請飭撥軍嚴防東北並接濟前敵米糧軍火等項各摺片覽奏均悉逆騎由深祁高陽竄擾任邱河間非北向雄固卽東撲天津任邱河間一帶爲扼要通衢楊飛熊一軍雖經趕到駐紮任邱而陳濟清一軍又將回顧津郡該處兵力尙單難資堵截著官文於潘鼎新程文炳兩軍內速撥得力之軍兼程馳赴雄縣任邱大城一帶均勻分布與丁寶楨所部東軍聯絡聲勢嚴行扼截毋任賊蹤竄向東北潘鼎新程文炳等軍到後兵力較厚設津郡

緊急陳濟清等各隊亦可隨時兼顧並著官文調派保定諸軍由西路節節進剿兼顧北面賊匪肆行無忌非痛加剿戮不足以挫兇鋒而寒賊膽官文當相機進擊不可徒事株守李鴻章派援各軍其未抵直境者著迅速迎提北上或替程文炳潘鼎新等軍扼紮保定或卽赴東北各路屏蔽近畿及津郡一帶著官文酌覈辦理總期各該軍取道便捷不至往返紆折爲要左宗棠當速催前敵各軍進剿毋稍延緩其應駐紮何處以便呼應較靈著隨時酌度辦理天津地方富庶逆匪垂涎已久崇厚見於該處水陸設防著卽嚴密布置並著設法聯絡鄉團鼓舞人心以資堵禦左宗棠前敵各營應用米糧軍火等項崇厚當隨時撥解轉運丁寶楨所挑之吉林黑龍江丹丁一千五百名著於行抵該撫行營時認真察看飭赴春壽行營會合步隊迅速進剿一切口糧仍由丁寶楨

籌給並著官文隨時節濟餉項軍火以備缺乏月餉著照所請全
行發給其各丹丁家屬養贍銀兩仍著隨時另行籌解以示體恤
其餘丹丁馬匹仍著丁寶楨飭令認真訓練調養以備調派將此
由六百里各諭令知之○諭庫克吉泰等奏陝軍剿賊獲勝情形
派員馳往汧寶剿賊暨請調蜀軍助剿各摺片米脂邠州宜川洛
川等處羣匪麇集經陝軍分路剿擊屢獲勝仗惟回逆股數太多
雖疊有新擒究未大受懲創著庫克吉泰劉典督飭各軍嚴密堵
剿遇賊卽擊以期盡殲醜類寶雞縣城被匪闖入復由寶雞竄至
汧陽該將軍等已派劉效忠張岳齡會同喻步蓮前往剿辦著卽
飭令該員等馳赴汧寶之間會合進兵實力剿洗陝省軍務緊要
見在兵力不敷剿辦周達武一軍著崇實迅飭該提督統帶所部
進駐隴汧之間與陝軍聯絡進攻以期迅殄逆氛寢沔一帶該署

督另派妥員前往接替以固蜀省門戶劉典另片奏稱蔣益澧熟悉軍情請飭迅速來陝等語本日已諭令瑞麟飭令蔣益澧趕緊馳赴陝西軍營並著左宗棠咨催赴陝以資得力將此由六百里各諭令知之○趙長齡開缺聽候查辦以鄭敦謹署山西巡撫

都御史署

○喬松年以病免以劉典署陝西巡撫

幫辦軍務三品卿銜

○癸未諭

內閣前派恭親王會同神機營王大臣辦理巡防事宜見在直隸軍務緊要所有各路統兵大臣暨各督撫均著歸該親王等節制○諭軍機大臣等據軍機大臣代奏前任戶部侍郎李鴻藻奏請派親王爲大將軍左宗棠李鴻章爲參贊督辦直隸軍務一摺見在各路統兵大臣並各省督撫帶兵入直剿辦捻匪雖經派令左宗棠總統前敵各軍仍恐各大臣等意見紛歧事權未能歸一以致呼應不靈本日已明降諭旨令各路統兵大臣並各該督撫等

均歸恭親王等節制矣各該大臣督撫等於賊勢軍情俱當隨時具報神機營覈辦惟軍情變幻靡常一切進止機宜仍應責成各該大臣等隨時相度辦理不得專候神機營指示俾免稽遲貽誤左宗棠李鴻章均係欽差大臣見歸恭親王等節制自可一事權而免紛歧所請欽派大將軍參贊等名目均毋庸議各該大臣督撫等身在行間親臨前敵務須合力同心迅圖攻剿肅清畿甸儻有推諉觀望株守不前致誤戎機者卽由恭親王隨時參奏其所請申明軍律約束兵勇等事卽著恭親王等札飭該大臣等遵照辦理將此由六百里各諭令知之○左宗棠奏臣行抵獲鹿一面派兵確探賊蹤一面採辦軍糧以備裹帶前進正月二十六日聞賊趨東鹿窺渡漳沱臣未及候糧卽督隊赴漳沱河北依橋扼紮以防該逆循河西竄旋據探報該逆由東鹿深澤向西北竄走並

援及定州北境適接劉松山郭寶昌來稟兩軍於二十二日四鼓會同安住馬隊在饒陽西北王岡西之張岡襲賊獲勝斃賊約四百名奪獲羸馬三百餘匹解散脅從二千餘名二十五日追入深州境內賊從西北繞避復向北趨臣比卽移駐正定東北正催糧拔隊間接張曜宋慶稟報二十七日馳出賊前自保定西路紮至滿城山麓出隊截剿獲勝賊已南竄並據張曜等稟稱劉松山郭寶昌已馳抵保定矣臣卽由新樂赴定州一面咨行見到直隸各軍在賊之北者向南壓剿在賊之東者自東北向西南進剿在賊之西者自西北向東南進剿各將前進日期報臣以便相機籌辦各軍亦互相知會步步偪壓如至滹沱河北各軍厚集機局緊湊卽蹙賊於河濱儻各軍距賊遠近不同不能如期並至卽俟該逆渡河後北路局勢更穩再行痛加剿洗臣至定州後如賊踰定州

東南臣亦卽移營南下與各軍聯絡進剿一切機宜謹當與署直隸督臣山東撫臣河南撫臣妥爲商酌上諭左宗棠所陳三路進兵並令各軍互相知會聯絡聲勢爲步步進逼之計布置頗合機宜惟賊勢見由祁定高陽分擾任邱河間意在東撲天津昨已諭令官文於潘鼎新程文炳兩軍內揀派得力之軍馳赴雄縣任邱大城等處分紮扼截東北矣丁寶楨見駐河間楊飛熊陳濟清等分紮鄭州任邱其河間以南阜城景德等處尙覺空虛賊騎避兵繞竄蹈隙乘虛是其慣技左宗棠見駐正定駐前敵較遠應行移紮何處並如何調撥各軍扼截或分路進兜以剿爲防杜賊竄津並紮竄東北之處均著該大臣懷遵昨日諭旨相度機宜酌量辦理將此由六百里諭令知之○諭庫克吉泰等奏逆回竄近省城籌辦情形一摺回逆由寶雞汧陽等處避兵突竄咸陽郿縣並

分股渡渭竄近省垣經庫克吉泰喬松年劉典飭令各將弁分投擊退惟賊匪紛竄肆擾我軍備多力分仍著該將軍等督飭在事各員時加防範遇賊卽擊省城重地關繫緊要經喬松年調回張岳齡一軍回顧省城劉典亦飛調楚軍五營回省著卽嚴飭各率所部視賊所在盡力勦辦兼顧省垣毋稍疏失省中回民甚多尤須加意撫輯認真防範毋任勾結爲患劉典見駐耀州未能移動喬松年雖已開缺仍須將省防事宜妥慎籌辦以期周密喬松年另片奏請令庫克吉泰回省等語省城防兵較單著該將軍統帶所部卽行回省與喬松年商辦城防俟防務較鬆仍著相機出省督剿喬松年密片一件著畱中將此由六百里各諭令知之○予陝西殉難知縣崔銓淦祭葬世職○甲申諭軍機大臣等文麟奏安玉一帶喫緊請暫駐防剿並擊賊獲勝情形一摺肅州逆匪由

南山邊繞至安西三道溝一帶經文麟督軍迎剿該逆敗向東竄官軍追至赤金堡沙岡墩等處奪獲甚多所有此次出力弁勇著暫行存記俟文麟抵哈密後續有勝仗再行彙案請獎玉門東接肅州安西敦煌又係追兵後路固應設法嚴防惟哈密同蹤麇聚豈可顧此一隅使之望援念絕著文麟懍遵疊次諭旨統帶所部趕緊赴任不得藉詞觀望其安玉各路應如何撥兵兼顧之處並著相機辦理景廉見在行抵何處卽著該大臣迅速咨催前進毋任逗留前有旨令穆圖善嚴飭楊占鼇迅赴肅州接辦西路軍務以便成祿剋期出關楊占鼇此時如未啟程著穆圖善催令星馳前往妥籌勦辦藉顧出關諸軍後路不准再涉遷延成祿俟楊占鼇到後卽遵前諭統率原部迅赴哈城會同文麟等實力勦賊如仍前玩泄致誤戎機該提督能當此重咎耶將此由六百里各諭

令知之○諭官文酌量截留漕糧接濟兵糈○飭四川等省月撥成祿軍餉○命鄭敦謹籌撥文麟月餉○乙酉諭軍機大臣等恭親王等奏請飭各軍剿捻以專責成並請將陳國瑞歸神機營調遣官文奏捻由高陽向東南奔竄各軍追剿情形各摺片此次令各路統兵大臣及該督撫等俱歸恭親王等節制原冀事權畫一和衷共濟而追剿堵扼仍應責之各路統兵大臣督撫分段剿辦方能迅速蒞事自易州及近京一帶已有神機營精兵防衛當可無虞侵軼所有保定西北兩面及屏蔽易州一帶著官文左宗棠分飭所部相機扼防保定東北兩面並天津池南及界連山東地方並大名以北著李鴻章崇厚丁寶楨分飭兵勇扼要堵剿備東北面兵力尙單並著李鴻章添派隊伍於河間池北一帶嚴防其直豫交界之彰衛等處卽著李鶴年英翰會同扼守該大臣等將

應防地段界址各自認定互相聯絡以期局勢緊湊左宗棠李鴻章久歷戎行所部尤爲精銳並著抽撥馬步勁旅相機兜剿所有到直之劉松山等軍及善慶溫德勒克西春壽馬隊並山東所撥東三省西丹著該督撫等妥爲籌商派赴前敵以利追剿所有一切進止機宜著該大臣等隨時酌度辦理不爲遙制儻有推諉觀望各情卽著恭親王等隨時察度指名嚴參該大臣等爲國家所倚畀值此京畿孔亟正臣子力圖報效之秋斷不可稍存意見致煩厯繫其所部兵勇並著嚴飭管帶官認真約束不准稍涉滋擾侍衛陳國瑞卽作爲神機營管隊官所需勇糧等項由神機營給發毋庸歸官文左宗棠調遣李鴻章見在行抵何處著卽迅速前進懷遵前諭相機扼紮所有軍情賊勢隨時具奏劉松山等軍並著官文嚴催追剿毋令逆蹤得以任意肆擾致滋蔓延將此由六

百里各諭令知之○丙戌諭軍機大臣等崇厚奏賊勢逼近津南請飭淮皖各軍進剿萬青黎王榕吉奏請飭撥官兵以固畿南一摺崇厚所奏賊匪竄擾獻縣之淮鎮並青縣之杜林鎮距青滄等城甚近似賊股大勢又已趨近津南情形萬分喫緊該處地廣兵單需兵甚急且各路軍火糧餉均藉津郡轉運接濟關繫非輕著左宗棠官文速派劉松山郭寶昌喜昌宋慶張曜各軍星夜兼程分道前進或由大城一路繞前迎擊或由獻縣一路躡蹤追剿務期趕緊剿辦不得專事株守任聽賊騎縱橫到處蹂躪見在河津一帶喫緊官文應先其所急速飭由安州進剿之程文炳一軍及春齡等所部馬隊一併馳赴任邱大城協力防剿丁寶楨駐軍河間著卽分撥所部於大城任邱一帶扼要堵剿並與天津兵勇就近聯絡聲勢互相援應兼顧北路以固畿南門戶並著李鴻章懷

遵前諭迅派得力大枝勁旅數軍由德州河間等處兼程迎頭進剿毋得稍事遷延該大臣計期早應行抵直境卽著於天津河間一帶相機進紮迅籌滅賊之方崇厚當督飭鄧啟元陳濟清等軍在津南一帶奮力迎剿並著將津郡防務嚴密布置天津民情素稱奮勇並著崇厚督飭該地方官聯絡紳團身先任事以資鼓舞左宗棠已行抵定州著卽照該大臣前議督飭諸軍向南兜剿力挫兇鋒以贖前愆萬青藜等另片奏擬築黃村等處堡寨等語黃村爲京南屏蔽該兼尹等見督官紳築立堡寨擬將南北兩面圍牆東至南苑西牆爲止並將黃村紅門圈入寨內著照所擬趕緊辦理其餘各屬地方堡寨並著該兼尹等督飭各地方官速爲興修以資守禦將此諭知萬青藜王榕吉並由六百里各諭令知之

○左宗棠奏捻逆憤技避實乘虛直隸地勢平衍難限戎馬主客

各將領身經百戰非不思迅圖蕲役而不能不防其北犯必於近京之處設立重防然後放心向南追擊臣維畿內西南路以涿州爲總要南路以固安爲總要茲值各軍雲集應派勁旅兩枝一駐涿州一駐固安以重形勢此爲近防之軍卽賊蹤稍遠亦未可遽撤也保定河間天津三郡鼎峙見有重兵在河間如天津有警尙可橫出截之然三郡屏蔽郊畿防軍儻涉空虛必多罅隙此爲且防且剿之軍須隨時調度不可併聚一方亦不可悉數南下也其進剿之軍則視賊所向併力攻剿如將逆賊偏過滹沱則與山東河南諸軍共收夾擊之效如賊逸而北則與保定河間天津諸軍共收夾擊之效較之專防而不能剿專剿而無以爲防者稍覺周妥臣謹擬就前敵各軍遵旨分別調撥以專責成臣於二月初四日行抵定州因沿途雇覓車馱極難軍糧落後定州雖可橫出高

陽而軍無隔宿之儲道出祁州博野一帶新遭蹂躪無從採購軍糧萬難由此前進擬徑由望都抵保定與官文通盤籌畫卽赴前敵督率諸軍一意進剿又奏查獲鹿入山踰太行至晉境以固關爲最險但得一千節制之師扼守關隘賊騎斷難挺走該處糧旣不足井泉亦少駐軍太多難覓飲食臣旣奉命總統各軍進剿日趨東北勢難兼顧固關臣所部五千人又未便再事分撥應請飭下直隸督臣抽撥練軍一千名迅往固關嚴防入晉之路儻賊蹤西竄前阻關隘後有追師山徑不能馳騁必難逃脫也 上諭賊勢見由獻縣竄擾青縣涿州一路有神機營兵駐紮丁寶楨見駐河間卽可北顧固安一帶前據神機營王大臣奏擬請各路統兵大臣並各督撫分路防剿當經諭令左宗棠官文專顧西北見在賊勢趨重東南津郡喫緊兵力又單保定一帶情形稍鬆左宗棠

日內計已到省卽著與官文商度機宜並迅催各軍分路進攻或繞前迎擊或躡蹤追剿不可稍形鬆懈恭親王等距前敵較遠左宗棠卽馳赴東南迅督各軍迎頭截剿痛埽逆氛一切進止機宜專候神機營指示以期迅速其西北一路防務卽著責成官文辦理固關一路空虚可慮著官文酌派得力直軍一千名交唐訓方統帶或另派統將帶赴該處防堵以杜賊匪回竄晉疆將此由六百里各諭令知之○諭趙長齡奏晉東防務緊要添兵堵禦一摺捻匪雖經東竄設被官軍截擊難保不遁而西趨晉省潞澤遼平四府州所屬沿邊各邑與豫直兩省毗連自當扼要設防以杜匪眾回竄左宗棠已由正定督師東向斷難兼顧西路之防鄭敦謹見署晉撫責無旁貸著卽查明沿邊各隘口遴派得力兵勇扼要設防並慎選地方文武使官與民相安庶可整頓鄉團以輔兵力

之不足河曲巡檢司以上冰橋尙未融消陝西神木府谷匪蹤正
熾與山右保德等處僅一河之隔著卽飭令陳湜嚴督兵勇實力
防堵不得稍有疏忽大同沿邊一帶當飛飭地方文武各員嚴密
籌防毋稍大意前次交查各件著鄭敦謹切實查明卽行覆奏將
此由五百里諭令知之○丁亥諭軍機大臣等劉琨奏援黔兵勇
攻克荊竹園賊巢並整頓吏治各摺片荊竹園賊匪據險負隅抗
拒官軍擾亂楚黔邊境十餘載經席寶田李元度等督帶楚軍進
剿將該匪老巢攻破擒斬首逆蕭潰盛等並將羅家巖賊巢一併
攻克匪黨殲除殆盡剿辦甚爲出力河東橋頂山河西偏刀水等
寨匪巢卽著劉崐飭令席寶田等乘此聲威迅速掃蕩俾得肅清
貴東黔省吏治廢弛日久李元度駐紮河西辦理善後著曾璧光
慎選樸實耐苦廉介不擾之守令前往任事隨時稟商李元度妥

籌辦理務期安輯閭閻免致激生事變其毗連湖南各縣地方官
卽著劉崐責成席寶田選舉賢員暫行任事以期呼應較靈劉崐
原片著鈔給曾璧光閱看將此由五百里各諭令知之○以湖南
官軍攻克貴州荆竹園賊巢賞記名布政使席寶田珍物總兵官
韓孝忠一品封典復已革按察使李元度職並賞還花翎餘加銜
升敘有差○戊子諭軍機大臣等官文奏陝豫各軍剿賊獲勝逆
蹤向西南奔竄並崇厚奏飭左宗棠等分路追剿各一摺此次陝
豫各軍到直幾及一月屢經諭旨嚴催始能協力會剿小挫兇鋒
見在賊向獻縣西南奔竄卽著左宗棠官文嚴飭各軍乘勝追剿
儻能蹙之於滹沱左右較易得手如該逆越河而南並著傳諭程
文炳潘鼎新兩軍節節進扼以爲劉松山等後繼左宗棠由定州
進省與官文晤商後著卽出省迅飭諸將視賊所向盡力追剿毋

稍稽遲該逆究竄何處並著官文詳細查明隨時具奏第逆情詭譎恐其復折而東李鴻章仍當嚴扼東北面以防竄越丁寶楨崇厚亦應力籌堵扼不可稍涉鬆懈崇厚因丁寶楨兵力較單不如李鴻章之兵勇較厚朝廷早已洞悉前已諭令該大臣駐紮河間一帶以顧東北面復以津防緊要諭令於天津相機扼紮該大臣接奉寄諭後著卽懷遵前旨迅督所部兵勇兼程北上會合陝豫各軍向南壓剿並著將進止機宜隨時奏報以慰廑繫崇厚另片奏請飭部撥餉銀以資接濟本日已諭知戶部撥銀十萬兩發交官文支用矣將此由六百里各諭令知之○諭德勒克多爾濟奏馳抵歸綏飭查邊防情形並往包頭察看河防一摺據稱口外沿邊沿河防務均經布置惟回逆馬家拉拉等率領馬步萬餘竄陷甯條梁其榆林神木等處又有回匪竄擾並高家堡被圍該署將

軍擬親往包頭一帶察看河防著卽悉心查勘會同桂成妥籌布置毋稍疏虞甯條梁地方爲山陝通衢關繫緊要金順見已馳至該處卽著督率所部迅圖規復儻任該逆聚衆久踞肆意蔓延必惟該副都統是問該署將軍亦當嚴飭防邊將士實力堵扼榆林神木一帶接近山西見雖冰泮河開仍應加意防範並著與桂成檄飭各軍晝夜梭巡毋令匪蹤闖入以固邊防將此由五百里各諭令知之○廣江西大庾縣學額十名○予直隸陣亡參將周德勝祭葬世職○己丑諭軍機大臣等丁寶楨奏官軍勦擒獲勝情形一摺此次劉松山等軍追勦擒逆殺賊千餘昨據官文奏已諭令迅速追勦計此時保定一帶防兵如潘鼎新余承恩等軍爲數不少足敷堵扼所有丁寶楨撥赴保定之東三省西丹一千五百名卽著官文飭令春壽將原帶馬隊一併馳赴前敵會同劉松

山等進剿官文不得一意截留致誤戎機左宗棠計已行抵保定該大臣諒必有滅此朝食之志卽著出省迅督前敵各軍設法兜剿剋期奏功丁寶楨著卽飭令莫組紳等軍跟蹤追剿李鴻章行抵何處久無奏報朝廷殊深慮念著卽兼程赴直見在東北面尙屬空虛抵直後卽遵前旨相機扼紮酌量分兵進剿毋再遷延貽誤致干重咎將此由六百里各諭令知之○諭德勒克多爾濟等奏回逆擾及草地蒙古官兵屢次接仗見籌防剿一摺據稱西路回匪竄陷甯條梁後復竄蒙古之依克沙巴爾等處蒙兵屢擊獲勝追至綽泰地方並乘夜往劫賊營賊仍退回甯條梁此股匪眾蓄意東趨雖經官兵擊敗難保不乘機竄越且地方遼闊尤恐防不勝防著德勒克多爾濟桂成仍遵前旨嚴飭札那格爾第等督率各軍相機堵遏一面檄飭巴達爾琿暨馬陞等加意嚴防並知

照金順迅帶所部繞由東路迎頭截擊痛殲醜類不准稍涉稽延
所有陣亡蒙古官兵人等卽著查明請卹保德河曲等處與陝疆
僅隔一河著鄭敦謹飭令陳湜親督在防將弁認真扼守其沿邊
之大同一帶卽著責令各地方文武時加偵察該署撫仍隨時咨
會德勒克多爾濟等悉心籌防以期互相聯絡藉壯聲威將此由
五百里各諭令知之○庚寅諭內閣前因擒匪竄至吉州由平降
擾及河朔特派鄭敦謹馳赴山西將趙長齡所辦軍務如何疏懈
及吏治廢弛之處確查具奏並因喬松年奏參吉州渡口爲梟司
陳湜舊防賊匪搶渡時陳湜之四營皆潰並所上左宗棠函係幕
客代爲飾稟及陳湜行至趙城停畱不進暨其族人陳膺福稟報
不實等情復諭令鄭敦謹於抵山西時明查暗訪據實具奏茲據
鄭敦謹覆奏趙長齡因注意嚴防河保致令吉鄉一帶兵勇單薄

迨該逆乘機搶渡擾及腹地又未能撥兵迅剿任賊蔓延咎實難
辭其陳湜被參各款或查無其事或查無確據惟該臬司督守全
河任令該逆乘虛搶渡又因順道赴省致誤事機實屬失於防範
貽誤地方請從重治罪各等語捻匪前次竄擾陝西等境屢經諭
令趙長齡陳湜嚴防河岸並責成陳湜總辦沿河防務諄諄誥誠
不啻至再至三趙長齡統轄全省乃任捻匪竄晉又不能奮力堵
禦致令闖入豫疆震及近畿實屬大負委任趙長齡著革職發往
軍臺效力贖罪陳湜專辦河防增兵益餉朝廷無不俯允所請乃
辦理一無成效卒致貽誤地方且該臬司到省之日卽賊匪搶渡
之日疏防失律厥咎尤重陳湜著革職發往新疆效力贖罪以示
懲儆其陳膺福等被參縱勇滋事等款仍著鄭敦謹查明參奏至
前據都察院代奏山西紳士曹翰書等陳請將趙長齡罷斥另簡

賢員等語此次查辦各情朝廷一秉至公毫無偏信該紳士等不
得以挾制長刁風爲疆吏者尤不可以泄沓滋口實也懷之○左
宗棠奏臣於二月初七日馳抵直隸省郊駐營黃家莊一面與官
文籌商防剿機宜一面催趲軍裝採辦口糧卽由高陽相機進剿
適准崇厚來咨捻逆游騎逼近青滄津南喫緊旋據深州採報賊
騎回竄州境距城僅十餘里等語賊情狡詐難保非西南游駛牽
誤我軍仍逞其圖犯津滄之計臣抵高陽後如賊勢仍趨東路臣
卽馳赴天津之北向南壓剿如賊由深州西南竄走卽檄程文炳
自高陽急起追截臣亦由東北而西南督軍奮擊見已飛檄前敵
各軍偵賊所向分道兜剿並力顧津南一帶臣既親赴前敵督剿
有人而保定省城屏蔽畿郊最關緊要官文見正料理前進臣勸
其少緩應否令其畱鎮省垣之處出自 聖裁頃據稟報二月初

四日郭寶昌與劉松山喜昌會軍進剿大獲勝仗倂賊向西南竄走是匪蹤又竄近深州青滄界內已無賊也 上諭軍機大臣等捻逆在獻縣境內被官軍剿敗折向深州一帶竄擾劉松山郭寶昌喜昌等業經各率所部會合追擊左宗棠即著出省馳赴前敵嚴檄該將士等實力兜剿迅殄賊氛毋任匪蹤到處蹂躪青滄界內無賊東路情形稍鬆該大臣當由東北徧向西南痛將賊匪剿洗毋任回竄程文炳一軍即著飭令由高陽一帶視賊所向節節進剿毋庸調赴大城任邱一帶春壽所部馬隊並山東新到之吉林黑龍江馬隊千五百名著左宗棠官文飭令春壽一併帶赴前敵會剿官文即著畱駐省城嚴防北路並接濟前敵各營軍火糧餉毋任缺乏賊勢漸趨西南固關爲山右門戶防守緊要前經諭令官文酌撥唐訓方帶兵千名或另派得力兵將前往該處防守

即著懷遵前旨妥速辦理山西平定孟縣一帶並遼州各山路要隘著鄭敦謹迅速派兵堵扼以杜賊竄晉疆之路毋稍大意將此由六百里各諭令知之○諭趙長齡業已革職鄭敦謹見攝撫篆責無旁貸其防守不力各員並縱容勇丁滋事之案著鄭敦謹確切查明據實參奏毋稍徇隱山西各路防務著該署撫妥籌布置河防尤爲緊要著左宗棠鄭敦謹酌派妥員接辦陳湜俟接替有人即行起解其未交替以前著鄭敦謹嚴飭該革員認真防範如有疏虞即以軍法從事左宗棠由晉入直於該處人才自能周知鄭敦謹曾任晉藩屬吏賢否尤所深悉如有得力之員迅即奏明辦理以專責成捻匪由陝竄晉蔓延數省左宗棠未能先事防維本有應得之咎念其跟蹤追躡已到直隸尙知愧奮前既予以革職畱任處分見姑免其死罪務將此股捻匪迅速殄除以贖前

愆儻再遷延玩愒日久無功必將從前貽誤之罪一併從嚴懲辦

懷之將此由六百里各諭令知之○以蔣益澧爲山西按察使

廣東巡撫

○追予貴州殉難知府鹿丕宗建祠○辛卯署貴州巡撫張

亮基奏請將辦理教案之已革知府多文等獎勵得旨多文於田
興恕案內革職永不敘用前據張亮基奏畱辦理籌餉帶練等事
不准干預教民事件當因該革員前案情節較重未經允准何得
顯違諭旨仍令干預教務所奏前後矛盾汪維翰亦係革職永不
敘用之員張亮基輒以委辦教民案件爲詞爲該革員等瀆請實
屬乖謬且督撫辦理教務係屬地方公事何得先向主教面商成
何政體所稱經理教案中外悅服等語顯有鑽營請託等弊所請
著不准行多文汪維翰並著勒回旗籍不准仍畱黔省○壬辰諭
內閣前據前任戶部侍郎李鴻藻奏大兵雲集統兵督撫分位相

堦無以一事權而泯意見請照咸豐三年故事派親王爲大將軍
坐鎮京師並令左宗棠李鴻章爲參贊大臣分路進剿當因逆蹤
距京漸遠特派大將軍坐鎮恐各路統兵督撫事事稟承必致有
誤事機而該督撫等勢均位埒轉不免互相推諉因派恭親王會
同神機營王大臣節制各軍原以杜進止不齊之弊嗣經恭親王
等奏請飭左宗棠由西北進剿李鴻章由東北進剿其官文丁寶
楨英翰李鶴年崇厚並神機營派出各軍分段嚴扼所有進止機
宜仍由該大臣等調度一切不爲遙制屢經諭令左宗棠等遵照
辦理該大臣等亦深知此意於軍務緊要之處卽隨時相機籌辦
並未事事拘執必行咨商致形紆緩茲據候補五品京堂王家璧
奏稱大帥之功在任羣帥中樞之功在任各路大帥惟恐各路統
兵大臣誤會前旨事由中制請明諭宣示等語王家璧於朝廷布

置及恭親王等陳奏各情未能深悉鯁鯁過慮恐外間無識之徒一唱百和騰其口說於行軍大有關繫不得不明白宣示左宗棠李鴻章官文英翰李鶴年丁寶楨崇厚均著仍遵前旨分路防剿一切進兵機宜卽由該大臣等妥籌調度不爲遙制儻有觀望遷延或意見參差致誤軍行者卽著恭親王會同神機營王大臣指名參奏以儆玩泄王家璧摺併發○李鴻章奏臣於二月初十日行抵德州郭松林楊鼎勳亦於十一日兼程抵德沿途雨雪泥淖馬駝倒斃輜重落後軍馬甚形疲乏探知捻逆被宜軍由北兜剿初六七日竄衡水境因滹沱河水勢大長未能竄渡初八日北竄深州王家井等處陝豫各軍仍分路兜逼臣查德州距深州僅二百餘里捻蹤趨向無定德景一路係竄天津要道而德州濱運河糧草較便臣暫駐此間籌提天津米糧以濟軍食兼扼東竄之路

並飭郭松林楊鼎勳趕緊整隊由景州阜城繞趨深州一帶偵察賊蹤會同各軍由東北向南兜剿藉可屏蔽近畿但慮直境兵多食少糧草購辦不及耳據潘鼎新善慶稟稱追賊至保定奉署督臣官文飭令扼紮要路以堵北竄臣卽函飭該司與善慶溫德勒克西唐仁廉等馬隊無論防剿必須合併一路如北路情形喫緊臣再督同郭松林楊鼎勳等間道繞赴保定一帶會商官文妥籌拱衛京畿以壯聲援上諭軍機大臣等見在捻逆向深州一帶奔竄劉松山等軍向南壓剿東北面仍屬空虛難保該逆不乘隙折竄牽掣各軍李鴻章若紮德州卽距深州已二百餘里追剿勢猶不及著卽懷遵前旨督率郭松林等軍迅速前進於東北一面相機扼紮不得以雨雪泥淖稍事耽延其周盛波等軍並著迅催北來以厚兵力直隸交界地方是該逆南竄之路牛師韓方長華

兩軍既抵黃河北岸著英翰卽飭該兩軍於彰衛一帶妥爲堵禦
豫省兵力較單英翰仍當駐軍河干與李鶴年會籌防剿此時毋
庸回穎交卸俟軍務稍平再行扶柩回旗以遂孝思皖省善後一
切事宜卽著咨令吳坤修妥辦李鶴年見駐安陽卽著整頓士馬
與英翰聯絡聲勢以防逸匪左宗棠計已馳抵前敵著卽檄飭劉
松山等各率所部跟蹤追擊並飭程文炳由高陽一帶進剿以期
四面兜圍使該逆不得紛竄丁寶楨近駐河間亦當飭令莫組紳
等軍向南緊逼崇厚所派陳濟清洋槍礮隊各軍亦當與東軍策
應毋得株守昨有旨令官文畱駐省城卽著將北路防務嚴密布
置刻下大軍雲集所有各營軍火糧餉該署督務當力籌接濟毋
令稍形缺乏本日據候補五品京堂王家璧奏密籌根本重計等
語前因捻蹤膺集畿疆特令左宗棠總統各路剿賊復命恭親王

等節制各路統兵大臣及各督撫原以一事權而免紛歧其追剿事宜仍責成左宗棠李鴻章等不爲遙制覽該京堂所奏是於此中機緘未能窺及已有旨將王家璧交左宗棠差委著俟該京堂到營時左宗棠卽將歷次所奉諭旨給予閱看庶曉然於朝廷之並無成見也又據御史游百川奏請飭各路統兵大臣迅籌滅賊並請詰其有無方略何時破賊切實自陳毋得飾報勝仗等語賊擾直境已逾一月各路官軍不下數萬若不迅圖剿洗糜餉勞師伊子胡底左宗棠等務各屏除意見勦力同心迅將此股賊匪就地殄除共奏膚功王家璧游百川原摺均著鈔給閱看將此由六百里各諭令知之○諭庫克吉泰等奏各營擊賊獲勝情形一摺此次回匪竄近省垣一帶經庫克吉泰等派兵夾擊賊向渭北遁竄其三不通地方賊巢經黃鼎攻克汧洛等處亦經擊賊獲勝並

收復寶雞縣城靈臺賊匪復經官軍擊退剿辦尙爲得手所有黃
鼎一軍攻克逆巢尤爲奮勉出力各員弁著准其存記策案請獎
仍著庫克吉泰劉典嚴飭各營將士將各處賊匪力圖掃蕩以期
迅殄逆氛見在捻竄直境剿辦尙未竣事陝省毗連晉豫處所甚
多該將軍等尤當嚴飭在防將弁認真堵遏毋任續有匪股東趨
是爲至要將此由五百里各諭令知之○諭穆圖善奏遵覆甘省
兵餉情形並官軍進剿官堡芻糧不繼及拾獲匿名許帖各摺片
甘省本係瘠苦之區餉需奇絀各處回匪擾亂防剿兵勇不能不
多朝廷素所深悉卽河狄未能肅清西甯一帶不得不暫示羈縻
亦係實在情形所有協甘餉銀卽著左宗棠劉典仍遵前旨飭令
徑解漢中糧臺毋庸解交陝省致多周折並著穆圖善知照湖北
督撫遵旨辦理左宗棠前撥海關洋稅銀兩爲數較鉅見在該大

臣提師入直需用雖殷而甘省爲該大臣統轄之地諒不忍暗

元

並著於解到時飭令酌量撥給以濟甘省之急穆圖善固不可

曉置辯左宗棠亦不必稍分畛域也河狄爲蘭州西路門戶穆

善見擬出省勦辦卽著迅速進兵次第廓清其官堡地方正在得

手之際並著穆圖善飭令王得勝等乘勝攻拔毋稍觀望所需餉

項著該署督迅籌撥給軍中捏造謠言鼓惑眾心亟應懲辦著穆

圖善將繕寫訐帖之人密行查究惟見在月餉久欠兵心易滋怨

望當於查辦之中妥爲拊循使兵心愛戴雖困苦不至生變方爲

妥協其上年防守省城及收復洮州克復渭源出力各員并准其

由該署督查明保奏以作士氣將此由六百里各諭令知之○諭

張亮基奏鎮將玩視紀律分別辦理一摺總兵林自清係有旨散

練回籍管束之員輒敢擅帶練勇戕官肆擄副將池有蓮奉派出

師按兵不動勒索銀米殘害官民總兵劉元勳剋扣軍餉任性妄爲均屬大干法紀黔省疊遭變亂民氣凋殘若再任驕將悍兵恣行橫暴民何以堪軍務亦安望有起色著曾璧光按照張亮基摺內所參各節逐細訪查將該員等撤回省城審訊明確卽行奏明正法以肅軍律惟該員等見均坐擁兵練務須不動聲色設法誘致毋致滋生事端方爲妥善張亮基摺著鈔給閱看將此由五百里各諭令知之○命候補五品京堂王家璧赴左宗棠軍營差委○癸巳諭軍機大臣等李鶴年奏探聞陝省回逆分股竄逼豫邊力籌備禦一摺據稱回逆於正月閒竄入岐山縣境突由扶風等處夾渭東趨其前踞三原涇陽回逆同時竄向高陵藍田臨潼各縣匪蹤已及灞橋等語是此股賊匪距豫省邊界已不甚遠亟應力籌堵遏爲先事豫防之計此時英翰已抵汴梁牛師韓方長華

兩軍亦到河北足敷扼守前駐豫西之馬德昭一軍應否移紮陝
豫交界地方以資堵禦之處著該撫酌度辦理並著該撫一面咨
會庫克吉泰劉典派兵繞前截擊一面飛飭河陝各屬激勵紳民
齊集團練以固邊防毋稍大意張捻由河閒竄向西南難保不仍
由順廣一帶回擾河朔著該撫檄飭各軍確探賊蹤認真堵遏藉
收夾擊之效將此由五百里諭令知之○諭宋廷春奏鎮沅廳城
解圍並克復南邱鹽井楚雄城池失守各一摺滇省迤西逆匪自
鎮南姚州各軍退守後遂占踞南邱鹽井並圍攻鎮沅廳城勢甚
猖獗經署總兵李錦文等調集兵練分路圍攻當將南邱鹽井克
復並乘勝將鎮沅城外賊營二十餘座一律攻破城圍立解勦辦
尙爲得手著宋廷春卽飭李錦文等趁此聲威進規雲緬以斷賊
援所有此次出力員弁兵練准其擇尤請獎毋許冒濫楚雄府城

因祿豐失利致爲杜逆以陷該處文武雖因援隔兵單究屬防守不力卽著飭令該員等會同楊國發等軍迅圖收復滇省情形危困必須督撫大員前往整頓軍務方有起色劉嶽昭計可由黔啟程著卽星馳前進督飭岑毓英激勵諸軍將各路逆匪力加掃蕩毋任日肆蔓延張凱嵩見已假滿卽著迅速赴滇會同劉嶽昭籌辦一切事宜不准藉詞觀望宋延春於張凱嵩劉嶽昭未到以前務須振刷精神妥籌防剿毋稍玩泄將此由五百里諭知張凱嵩劉嶽昭並傳諭宋延春知之○甲午諭內閣理藩院奏遵議承襲汗王等爵一摺所有杜爾伯特汗爵著棍布札布承襲棍布札布所遺親王著巴咱爾札那承襲巴咱爾札那所遺貝勒著噶勒章那木濟勒承襲○諭軍機大臣等蔣益澧奏改辦太平關稅收支確數及徵收洋稅數目各摺片廣東太平關稅務經蔣益澧奏明

改辦後一年期滿共徵正額盈餘銀十八萬九千八百餘兩又江海關代徵絲稅紋銀四萬二千九百餘兩較之額定數目不惟不虧並且大有加增嗣後卽可按照此次辦法覈實徵收涓滴歸公以杜中飽著瑞麟李福泰督飭南韶連道實力奉行毋得始勤終怠以致夙弊復生儻此後正稅盈餘再有短絀卽將該道及各委員據實嚴參著落賠補此次動支經費洋銀四萬一百餘兩既係實用實銷著准其動用此後遞年支發前項銀兩並免其扣減二成以示體恤該關稅務業已辦有眉目嗣後卽責成該道一手管理毋庸再派知府幫辦其太平等四分廠委員仍由巡撫遴選委員派充一年交替由該道隨時稽察所有徵收各貨稅則比照條款著卽開列清單咨照戶部備案林述訓何世俊等辦理稅務尙臻妥協著李福泰查明酌量保獎將此由四百里各諭令知之○

署直隸總督官文奏捻逆西竄見與左宗棠面商機宜撥軍防剿
得旨賊蹤見由深州西竄左宗棠既經督軍前進官文當飭令潘
鼎新嚴防西北一路務臻周密春壽所部馬隊昨據神機營奏令
與陳國瑞會同進剿著卽飭令相機前進聯絡前敵各軍互相策
應毋稍觀望又奏調佐領全福等赴營差委批著咨行富明阿飭
令全福等酌帶兵丁馳赴直隸軍營歸春壽統帶毋稍稽延○予
直隸陣亡總兵官李光連參領奇克新等祭葬世職○乙未李鴻
章奏臣前抵德州探知捻逆盤旋深州衡水交界距德甚近卽飭
郭松林楊鼎勳大隊由景阜前往兜剿十二三日該兩軍隊伍輻
重整備卽於十四日由景州武邑西北徑趨深衡之交視賊所向
會合劉松山郭寶昌張曜宋慶等軍分路壓剿偏賊南趨據探該
逆被剿情急意欲渡河南竄適滹沱河雪水漲發衡水一帶不能

偷渡臣軍又自德州追逼逆眾見往西南逃遁等語臣初至此聞不知滹沱河上游藁城正定等處水勢若何該處有無防兵逆蹤原無定向若不得渡必圖他竄查深州一帶既有劉松山等軍保定防軍亦厚既可無虞北竄臣因東面空虛飭郭松林楊鼎勳從東兜進藉以遮蔽景獻一路該兩軍馬步四十營素稱勁旅遇賊當可痛剿但恐我軍一到賊已旁竄臣又飭該提督等無論賊走何處總須猛力追壓使之不能喘息臣卽日督帶周盛傳馬步十一營進紮景州爲郭松林後繼若該逆越滹沱而南臣再相機進駐大名一帶就近調派與左宗棠等會籌布置山東撫臣丁寶楨親督王心安七營在河閒居中調撥已派楊飛熊八營扼紮任邱又派莫組紳十營四出追剿是其兵力尙非甚單賊勢見趨西南河閒情形稍鬆聞該處糧草艱貴似未便兩軍並紮致多擠雜臣

軍帶赴北路者郭松林楊鼎勳爲一大枝已派進剿潘鼎新善慶

等合爲一枝已派扼紮保定西北礙難移調僅周盛傳馬步十一

營隨臣護衛此外並無他軍其零星各營當畱防黃河以南劉銘

傳因病請假所部暫難北來儻必令臣專防河間天津一帶應請

調回郭松林楊鼎勳等勿庸進剿由臣帶赴東北妥籌布扼丁寶

楨卽可帶東軍回本境分防德州臨清東昌等處伏乞訓示遵行

抑臣更有陳者剿捻與剿他賊情形迥異賊蹤飄忽瞬息百變祇

須揀派大枝勁旅敢戰宿將與之隨地兜逐相機剿辦不能取決

進退於數十百里之外致誤機宜臣前在山東辦任賴等股祇管

選將練兵不管臨敵調度諸將無所牽掣得以放手剿辦倖告成

功至防捻亦與防他賊情形迥異捻賊無攻城奪寨伎倆故城寨

易防而平原難防凡城池失陷必其城已倒坍或無壯丁可守也

平原四達則祇能守城寨城寨之外不能禁大股之不衝突馬賊之不游駛惟大山大水可以扼之直境四望寬平除漚沱滏陽衛運各河西淀東淀一帶略可設法置守但人少亦不濟事此外有剿法無堵法其言防言堵似祇虛聲而無實濟臣於辦捻粗有閱歷既有所見不敢不據實憑陳 上諭軍機大臣等丁寶楨奏莫組紳一軍追賊深州東鹿等處疊有斬擒皖豫各軍亦在東鹿大捷李鴻章以賊在深州擬派郭松林楊鼎勳大隊由景州武邑西北前往進剿惟捻騎飄忽靡定見據丁寶楨奏稱賊有竄望都之信李鴻章當檄郭松林等視賊所向會合劉松山郭寶昌張曜宋慶喜昌等軍分路壓剿偪賊南趨見在西北一路兵力較厚東北尙覺空虛丁寶楨飭楊飛熊一軍進紮雄縣而令莫組紳回紮任邱布置尙妥李鴻章見由德州北上著卽督率周盛傳等營進紮

河間爲畿南及天津屏蔽並著崇厚飭令陳濟清等統帶天津槍隊練軍聯絡防剿以期周密丁寶楨俟李鴻章行抵河間後卽回駐東境在德州一帶扼要駐紮分布東省境內諸軍嚴防臨德東昌等處其所部王心安楊飛熊等軍卽著分布河間以南獻縣景阜等處與李鴻章聯絡聲勢以固東路之防儻此時賊已改竄東南應如何分路防剿之處卽著李鴻章與左宗棠丁寶楨等商酌調度務期周密左宗棠見赴前敵進剿著卽飭令所部與李鴻章所派各軍實力兜擊滹沱河水勢漲發賊騎不能偷渡各路官軍厚集正可三面兜剿偪諸河干爲聚殲之計左宗棠李鴻章務當合力同心迅圖殄滅不可稍分畛域望都距保定較近西北一路防務並著官文安籌布置毋任賊蹤再行北竄見在郭松林等軍旣經李鴻章飭由景州武邑前往進剿正資得力不必撤回多此

紆折軍情旦夕異宜不可稍涉拘泥儻潯沱河水勢旋消賊蹤竄渡而南李鴻章亦當相機隨時追剿不得株守一方至前派神機營王大臣節制各路統兵大臣並各督撫原以一事權而杜紛歧其進止機宜曾節經諭令該大臣督撫等臨機決斷毋庸聽候神機營指示致多牽掣該大臣督撫等當善體此意不可藉詞推諉將此由六百里各諭令知之○丙申諭軍機大臣等穆圖善奏官軍攻克官堡賊巢進剿渭源大捷並據景廉咨甘州接仗出力員弁請獎暨景廉奏馳抵甘州籌辦情形各摺片同逆自渭源被創後恃官堡險隘負隅自固經副將范銘督軍前進大挫兇鋒立將該堡攻克洵屬不避艱險奮勇可嘉仍著穆圖善檄飭該副將會同各軍進攻狄道迅殄賊氛該副將營米糧缺乏並著穆圖善飭豫昌分設糧臺源源接濟所有此次出力各員弁著准與前次克

復渭源等處各軍彙案擇尤請獎以示鼓勵提督傅先宗追賊於火兒寨地方生擒賊首馬四等正法王得勝等又屢平賊壘奪回一桿旗要隘著飭令該提督等乘勝進兵會攻狄道毋稍懈弛其傷亡弁勇著由穆圖善查明奏請議卹以慰忠魂景廉既已馳抵甘州所籌應行製辦皮衣各件爲該兵丁禦寒要需著照所請將穆圖善發交部頒各照及藩庫實收發給該地方官妥爲勸捐迅速籌備安玉敦三州縣前有旨暫歸文麟節制景廉與文麟同辦一事所有各軍口食應由該州縣撥解供支之處著會同文麟體察情形辦理文麟屢奉諭旨催令赴任計可行抵哈密景廉將一切製辦齊備卽當剋期出關與文麟盡心籌辦毋稍玩延景廉請刊木質關防著准其刊刻開用以昭信守所請飭晉省籌撥銀兩著鄭敦謹迅撥銀五萬兩解交歸綏道庫由該處派員從阿拉善

旗舊土爾扈特游牧運送玉門縣交文麟景廉軍營應用以資接濟毋得延誤將此由五百里各諭令知之○予江蘇陣亡布政司理問銜徐燦等祭葬世職○予浙江殉難通判沈裕申建祠知縣伍崇熙祭葬世職○已亥諭軍機大臣等官文奏分撥馬隊防剿一摺捻逆見聚深澤晉州之間因渚沱水漲未能竄渡李鴻章復派郭松林等大隊由景州武邑進剿著卽飭令趕緊前往並著左宗棠督飭前敵諸軍乘此機會三面兜圍偪諸河干爲聚殲之舉毋再延緩東省所練之吉林黑龍江丹丁馬隊一千五百名著官文卽飭令營帶之侍衛春山等星夜馳赴前敵歸左宗棠調遣俟春壽到營時仍歸併春壽統帶並著催令春壽迅率所部前往會剿陳國瑞見已募勇成軍官文令安住挑派所部之黑龍江馬隊八百名會合進剿兵力尙單難資得力仍著該侍衛會合春壽所

部馬軍卽赴前敵俾資厚集高陽一帶爲省城東路衝要總兵劉祺所部勇力較單官文見派唐仁廉趙喜義各部兵勇前往合紫著卽嚴檄實力防堵李鴻章此時當已遵奉前諭由景德北赴河間所有東北各路著卽嚴密布置並著兼顧高陽一帶聯絡聲勢以杜該逆回竄滿城沿山隘口既有潘鼎新等軍分段布防卽著官文飭令實力扼守以固西北一路毋稍疏懈將此由六百里各諭令知之○庚子官文左宗棠奏捻逆於獻縣富家林等處經劉松山擊敗後卽竄向深州所屬窩鋪頭五子台一帶盤踞二月初十日劉松山郭寶昌喜昌馬步各軍分路進剿窩鋪頭該逆驚遽失措卽向西南紛竄劉松山督兵驟進將賈城瓦口等村賊巢十餘處攻破斃賊甚多敗賊悉向北梨園村竄走各軍躡蹤追及逆首張總愚率悍賊數千冒死返撲劉松山督隊鏖戰適郭寶昌攻

破五子台等處賊巢馳至合隊聲威更壯奮力衝殺斃賊數百名賊不能支悉向西南敗走喜昌所部馬隊復將馬隆莊趙家馬頭南梨園鄭家莊一帶踞賊擊散斃賊三百餘名各軍追剿一十餘里十一日抵深州迤西之東陽頭收隊計共擒斬悍賊千餘名奪獲羸馬軍械無算解散脅從數千名十二日五鼓劉松山等軍復分道而進賊匪遁向祁州劉松山等卽回軍追剿遇賊奮擊馬隊徑穿賊陣將賊隊衝爲數段步軍乘勢蹙之立刃悍賊數百奪賊羸馬五千有餘逆賊紛紛敗竄十三日追至博野屬之南鄧村該逆排隊迎擊圍撲郭寶昌營盤劉松山喜昌馬隊分道夾進騎賊分作數十團擁擁突至步賊繼進官軍槍礮環轟騎賊紛紛敗潰步賊望塵先遁各軍乘勝掩殺宋震張曜適由北面壓剿而來賊悉向西竄各軍合追二十餘里收隊而還方賊之衝撲郭寶昌營

盤也適郭寶昌來臣宗棠行營議事歸途遇賊圍之數重副將王鳳鳴等率馬隊來援郭寶昌與隨馬騎卒左右馳突戮斃賊匪數名始得與王鳳鳴會合于總岳正江力護主將被槍陣亡已保知縣府經歷方開第在後遇害傷亡兵勇十餘名是日臣宗棠適抵蠡縣聞賊東趨出隊邀擊擒斬賊探十餘名十四日西行追賊行抵望都之界南村知賊蹤南竄有由正定趨獲鹿之勢乃與各將領計議以張曜宋慶兩軍自祁州向西南偪勦劉松山郭寶昌喜昌各軍自北而南兼顧西路亟檄程文炳趨正定期蹙賊於河濱臣卽於十五日進至祁州之北張村十六日途次聞張曜宋慶劉松山郭寶昌等擊賊獲勝尚未接據各軍呈報見已添調春壽善慶馬隊馳赴前敵以利奔追但期偪向西南則局勢較易得手李鴻章奏據郭松林等稟報二月十六日郭松林楊鼎勳等軍行近

安平城下賊騎突從西北衝至郭松林等卽派馬隊迎剿趕調後路步隊接應小有斬擒乘勝追殺里許步賊從後突出如牆排進馬隊稍卻郭松林楊鼎勳亟令李長樂等各督步隊馳至槍矛擊刺鏖戰三時斃賊甚眾楊鼎勳等又派馬隊鈔出賊後張逆腹背受敵奪路狂奔我軍追殺至夜始行收隊計陣斃悍賊千餘名生擒五百餘名奪獲器械馬無數四更後賊乘霧繞路竄逸郭松林等督隊急起追之自西而南至饒陽之楊家村該逆回軍拒戰賊酋張志青劉琅夏以芒領數百騎乞降餘眾向東南敗走追二十餘里劉松山郭寶昌張曜宋慶程文炳等均率眾來會楊鼎勳郭松林與之晤商擬各揀選精銳跟蹤會剿將各軍輜重運存安處俾可輕裝追擊早清畿甸十八日賊折竄饒陽以北張曜宋慶連夜躡擊郭松林等亦赴饒北迎頭截剿該逆繞回東南由獻縣

武邑境內復向西南逃竄盤踞深州交界之畱楚鎮見仍會商各軍設法兜剿等語臣督周盛傳馬步各營於十七日行抵景州疊據武強等縣稟報賊在西路各軍兜剿喫緊時恐敗匪東竄景德武衡一帶虛無一兵難保該逆不由此徑竄滄青津郡又形喫重臣已令周盛傳挑派八成行隊進趨武強小範河口探蹤截剿爲郭松林等援應並遮蔽越河東竄之路疊奉諭旨飭卽進紮河間查賊匪敗竄東南景州武邑亦當衝要臣旣派隊進扼自未便遽行北去徒煩更調俟各軍會齊大舉賊蹤趨向稍定臣再相機督軍進紮仍飛飭郭松林楊鼎勳等約會各軍乘勝兜剿其力戰陣亡之擬保總兵銜副將尹昌景參將擬保副將龔興祖擬請飭部從優議卹以慰忠魂 上諭軍機大臣等官文左宗棠李鴻章奏剿賊疊勝各摺覽奏欣慰具見該大臣等調度有方將士用命本

日已明降諭旨宣示卽著官文左宗棠李鴻章乘此聲威迅飭各軍商同兜剿蹙之溥沱河濱一鼓殲除同膺懋賞見在賊勢已蹙左宗棠擬添調春壽善慶馬隊以利馳逐春壽所部馬隊前本有旨會同陳國瑞步隊作爲遊擊之師左宗棠係統兵大臣卽著隨時調度將春壽陳國瑞一律調赴前敵以資攻剿兼可相機策應各軍李鴻章因景德空虛恐該逆被剿東竄津郡又形喫重見飭周盛傳挑隊徑趨武強小範河口截剿爲郭松林等後援兼以屏蔽東路該大臣擬暫駐景州卽著照所請辦理儻賊有向東北竄逸之信仍著該大臣進紮河間以資堵剿丁寶楨卽飭王心安等軍相機扼紮隨時偵探毋致稍有疏失崇厚亦當飭令陳濟清等軍加意防範不可以賊蹤略遠稍涉大意保定一帶仍著官文妥爲防範毋令乘間竄逸是爲至要將此由六百里各諭令知之○

諭庫克吉泰等奏稟報陝軍近日擊賊情形德勒克多爾濟等奏查探賊蹤趨向見籌堵剿暨請飭陝甘督撫等安置流亡各摺片回逆竄擾汧隴等處經總兵羅洪德等分路剿擊屢獲勝仗其在涇州盤口川踞逆亦經提督張在山率軍追殺賊各紛散卽著庫克吉泰喬松年劉典檄飭各防將士嚴守要隘遇賊卽擊毋任四出蔓延甯條梁失陷程興烈一軍被賊衝散該逆遂攻陷懷遠旋撲榆林南關並竄入神木縣城仍向榆林一帶竄走庫克吉泰等見派劉厚基前赴榆林著卽飭令該提督迅速馳往痛加剿洗所有神木縣殉難文武各員及懷遠等處各官下落均著查明分別辦理榆林神木各境逆匪由府谷一帶竄近皇甫川麻地溝勢漸北犯草地東撲冰橋並有撲犯保德河曲托克托城包頭鎮之說見在河冰未泮各處口岸亟應設法嚴防著德勒克多爾濟桂成

卽飭巴達爾琥札那格爾第等督率沿邊蒙兵實力堵禦並探明賊蹤相機迎擊一面檄令馬陞隨時防範毋稍大意鄭敦謹亦當遵奉前諭嚴飭防河將士於保德等處併力堵扼並飭大同沿邊一帶地方文武慎守邊防毋令匪蹤闖入前有旨令金順迅赴甯條梁剿賊該副都統見已由定邊前進著卽會同胡世英迅將該鎮收復並繞赴東路一帶迎頭截擊不得稍涉稽延致賊勢日形延蔓德勒克多爾濟等奏體察邊防情形實由各處難民無所安插迫而爲匪暨各營游勇到處擄掠以致滋蔓難圖所奏不爲無見嗣後陝甘各省遇有收復地方百姓未經歸業者卽著該省督撫及各路帶兵大員無論漢回妥爲安插撫卹免致流離失所各營勇丁務飭管隊官嚴密稽查如有因不得力裁撤者並著酌量給資令其各回原籍不得任聽淹畱在外滋生事端將此由五百

里各諭令知之○予陝西陣亡總兵官文星明直隸陣亡副將尹
昌景等祭葬世職○辛丑諭軍機大臣等李雲麟奏新城籌辦經
費並請將車林多爾濟起用本日已有旨將該親王作爲科布多
幫辦大臣矣布倫托海一城經營伊始該大臣又係勸議之人尤
應悉心籌畫據奏於本月初九日由烏啟程著卽趕緊前進將該
城籌辦經費及一切事宜妥爲經理該大臣素以忠懇自期必能
感恩知奮實踐前言不至意存觀望也科布多地方緊要並著李
雲麟咨令車林多爾濟迅速赴任以重職守將此由六百里諭令
知之○諭景紋奏商同達賴喇嘛等擇吉諷經一摺前因西藏僧
俗人等公請達賴喇嘛念誦真經爲國祈福朝廷嘉其忱悃業經
頒給黃哈達等件交達賴喇嘛祇領用昭恩賚茲據景紋奏稱因
見在內地逆氛未靖兼以上年京畿雨澤愆期該達賴喇嘛等憂

慮之心見於顏色商議攬集僧眾擇期開壇恭設覆鍋大會其布施功果均係自行捐辦該達賴喇嘛梵修有素報效出於至誠此次率眾諷經著景紋安爲照料並發去黃哈達一箇銀曼達一箇鈴杵一分椰子念珠一串玉盃一箇玉碟一箇黃段二卷傳諭該達賴喇嘛令其祇領用示恩賚頻加至意將此諭令知之○以新設布倫托海城池倡捐經費賞辦事大臣李雲麟父母從一品封典郡王銜札薩克貝勒錦丕勒多爾濟郡王並以郡王銜貝勒世襲札薩克郡王桑噶西哩紫纒公銜二等台吉達瓦車林以公銜世襲伊勒固克森呼圖克圖羅布桑三都普通善禪師名號○壬寅諭軍機大臣等崇實奏調撥楚軍迎擊渭北回匪劉嶽昭奏苗匪投誠分別安插並滇省軍務喫緊難顧貴陽暨請飭川省協餉各一摺陝省回匪肆擾股數較多兵力難於兼顧前因回逆竄擾

寶雞諭令崇實派周達武馳赴汧隴扼剿該署督見已派令周達武所部之提督李輝武率勁卒三千人由褒城取道留壩鳳縣出駐汧陽仍令周達武統率所部並增募千人駐防大安驛一帶著卽飭令與李輝武聯絡聲勢並兼扼徽文兩當之衝以固川北門戶所有該兩營糧米仍由川省設法轉運毋令缺乏黔省白泥壩苗匪見既畏罪投誠著劉嶽昭卽飭令將軍械呈繳設法解散並著曾璧光慎選地方文武分別安插各令歸業所有苗匪侵占民人田畝並令清出以杜釁端其善後事宜曾璧光當飭大定文武速爲接辦該處積匪散處暗伏劉嶽昭當一面督飭營員設法剿捕一面知照曾璧光趕緊接辦以便迅速赴滇所有剿辦苗匪之在事員弁准劉嶽昭彙案擇尤酌保毋許冒濫滇省軍務緊要杜通股匪較貴陽匪徒尤爲猖獗劉嶽昭勢難移師回顧貴陽著卽

速將邊防事宜交代星馳赴滇督勦所有黔省邊防並貴陽附省
匪徒仍著曾璧光與張文德會籌妥辦不得專待客兵援勦劉嶽
昭既須畱兵兼防川邊所帶入滇之師爲數較單不敷防勦自應
添募新軍以厚兵力所需月餉三萬兩著崇實設法按月籌解務
須源源接濟不可稍有推諉滇省情形糜爛甚於貴州非得大枝
勁旅不足以張撻伐設令餉缺兵潰川省豈能安堵是援滇卽以
安川該署督當深明此意力顧全局不得強分畛域劉嶽昭另片
奏請令史致康辦理川省捐務等語四川候補道史致康熟悉川
省情形著崇實卽飭令該員在川辦理滇捐事務並著飭令四川
藩司與史致康會辦以資得力將此由六百里各諭令知之○予
四川因公淹沒副將張福田等卹廕○甲辰諭軍機大臣等前據
左宗棠李鴻章官文先後馳奏深州安平勦賊疊勝各情當經降

旨宣示冀得乘官軍會合聲威大振之時剿此窮寇必可剋期奏功乃至今數日尙未續有捷報見聞逆眾日少器械亦不齊全勢甚窮蹙若曠日持久不能殄除則必有誤春耕而上年畿輔水旱頻仍民情飢困不堪加以兵燹滋擾必致窮而爲匪勢益蔓延於畿輔大有關繫著左宗棠李鴻章官文嚴飭前敵各軍迅速進剿蹙之滹沱河干一鼓蕩平毋得各懷觀望遷延時日致干重咎丁寶楨亦當飭令莫組紳各軍整陣以待以杜逆蹤旁竄不得稍涉疏懈將此由六百里各諭令知之○諭劉典奏回匪竄擾無常見商辦理情形並請另簡陝西巡撫仍帶勇剿賊各摺片回逆自竄擾汧隴後鳳翔麟游等境又復蠶擁而來是陝甘回匪已有路路牽掣之勢邠州董志原回逆將家屬移赴環縣其趨向亦屬無定周家口吉兆坡等處賊股雖經張岳齡于奇泮等剿擊賊眾分逃

而伏匿叢山之賊尙多並未大受懲創劉典見檄高連陞劉端冕等分駐宜君鄜州等處黃鼎譚玉龍等軍仍駐邠州長武一帶所籌尙屬周密著卽會同庫克吉泰嚴飭各軍覘賊所向迎頭截擊以期節節掃蕩毋任蔓延該署撫與庫克吉泰分駐三原咸陽並著隨時相機扼紮不得專顧一隅周達武所派之軍已駐鳳縣應否移紮寶雞以厚兵力之處著卽咨商周達武妥籌進止以顧陝南一路其由甯條梁竄入之賊屢陷懷遠神木旋回榆林各情與德勒克多爾濟等前奏情形大略相同已有旨令金順由定邊前進繞赴東路一帶截擊並諭德勒克多爾濟等嚴爲防範矣惟該逆詭譎異常不能東竄卽思西擾劉典務當力籌兼顧激勵各防將士步步緊逼毋令該逆得以喘息肆意東趨陝省軍務方殷該署撫身受厚恩務須亟圖報稱與庫克吉泰督率諸軍痛殲醜類

以紓朝廷西顧之憂毋庸以巡撫責重難於勝任爲詞致滋貽誤
將此由五百里諭令知之○乙巳諭軍機大臣等前據侍郎延煦
等奏接見朝鮮委員並查勘鳳凰巖陽兩邊門外大概情形各摺
件當經諭令恭親王會同大學士六部九卿公同商議副都統奕
榕一併會議具奏茲據恭親王等奏稱細閱延煦等所奏查勘各
處私墾地畝並屋宇窩棚鋪戶雖未全行開闢已無大段閒荒而
朝鮮所慮專在民物濶雜欲除涸雜之弊在乎邊境之嚴復經該
親王等會同延煦奕榕詳加審度將展邊一切事宜分別商酌並
請飭盛京將軍會同原勘之延煦等悉心查辦等語覽奏均悉著
仍派延煦奕榕馳驛前往奉天會同都興阿出邊查辦惟事當勘
始必綱舉而目始張且與外藩交涉尤應禁令修明方能垂諸久
遠都興阿前於入山查勘一節迹涉推諉此事係該將軍專責豈

能置身事外延煦奕格行抵奉天後卽著都興阿帶印出省會同周歷妥辦所有該衙門日行事件卽咨交副都統清凱代拆代行都興阿務當按照該親王等所奏各節並將未盡事宜妥爲籌辦儻仍意存觀望虛應故事以致貽誤將來有壞大局必惟該將軍是問延煦奕格均經親歷其境自必了然於心此次奉命前往尤當會同都興阿逐一查勘認真辦理以安邊境而衛藩封不得稍形疏漏恩合旣屬明悉邊情卽著加恩賞給五品頂帶交都興阿等帶往差遣該員務當感恩圖報悉竭所知如果遇事盡心將來尙可錄用如再不知愧奮則自外生成朝廷斷不爲寬貸前次延煦等接見之朝鮮使臣所設問答均極明晰足見該國之深明大體洵堪嘉尙卽著禮部傳知朝鮮國王俟查勘定議後務須嚴飭該國邊界官員一體遵守以副朝廷安民弭患之意恭親王等原

摺著鈔給都興阿閱看將此各諭令知之○丁未官文左宗棠奏
二月十五日宋慶率所部行抵深澤縣南逆騎千餘馳至當經宋
慶擊敗是夜二鼓張曜一軍繼至合隊劉松山偵悉賊蹤麇聚深
澤縣南二十餘里各村卽約宋慶張曜各軍分路進剿十六日宋
慶張曜襲破西華集一帶賊踞村莊敗賊向南潰逃漸又向東官
軍躡蹤追剿該逆未敢回拒計生擒悍賊二百餘名斬殺無算解
散脅從尤眾各村遺棄輿馬輜重不計其數劉松山等督隊逼近
賊巢知宋慶等已在接仗催軍亟進將小教村之賊擒殲殆盡蹣
追二十餘里薄暮收隊計共斃老賊數百名拔出難民無數是日
臣宗棠聞賊在深澤南潰敗折向東北卽飭程文炳赴剿自率親
兵各營赴無極擬蹙賊於陳村桃園水濱申酉間賊至安平西北
爲郭松林楊鼎勳兩軍所敗十七日賊眾竄至饒陽之蔡家莊南

旺村一帶十八日程文炳由西南面進攻將南旺村攻破督隊躡追餘賊劉松山等由東北面壓剿而前亦將賊踞各村奪回天明各軍會合四面兜擊該逆向南奪路而走各軍躡追二十餘里沿途擒斬甚多直至獻縣始各收隊是役共斃悍賊七百餘名生擒二百餘名拔出難民數千人奪獲羸馬器械尤多是夜賊由饒陽以南向西竄走據郭松林楊鼎勳呈報十八九兩日擊賊獲勝賊趨深州等語十九日劉松山等向西追剿二十日追至距晉州二十里之石村偵知賊騎已至晉州西南慮其折向北趨乃分兵向西北繞進二十一日賊騎果向西北比見官軍立即駭遁折向東南竄走各軍分道追擊均有斬馘二十二日抵深州東十里之張姓莊調悉該逆距宿大洪營一帶劉松山約各軍進剿賊見官軍向東潰走各軍乘勢追擊沿途殺賊頗多是役共擒斬悍賊約三

百餘名臣宗棠於十七日追賊至無極之石村聞賊折向東南擬
卽改赴東路而行營已乏糧三日途中零星採買日不敷食不得
已於十八日馳至正定將派員購到之糧裹帶以行比思直趨河
間二十三日行過肅甯五里駐紮牛軍莊賊從西南折而西北仍
向東南至是被各軍追擊忽向東北竄至肅甯據探馬回報賊騎
已突近副將楊鳳元營門楊鳳元率馬隊數十騎迎擊步隊繼進
賊分正南東南西南三路猛衝而來楊鳳元派隊分投截剿槍矛
並進斃賊多名被創落馬者不少生擒四十餘名賊皆狂奔而去
是夜四鼓楊鳳元復帶馬隊乘霧追襲槍斃賊匪多名賊眾驚潰
遺棄羸馬旗械不可勝計二十四日臣宗棠督親兵及各營跟蹤
追剿行約三十餘里追及斷後騎賊當飭提督楊和貴副將楊鳳
元都司丁太祥等各派馬隊數十直前衝擊斃賊數十名生擒百

餘名分別斬釋餘賊向南狂竄訊據生擒賊供二十三日賊伺隙向東北奔竄不意官軍突起迎擊將賊隊截斷直至二十四日午後始繞避官軍悉向西南合股等語適程文炳馬隊馳至卽飭向祁州躡剿臣宗棠於二十五日向蠡縣以顧高陽前路查十一日之役郭寶昌陣前受騎賊張九兒等之降並陣斬賊目方黑兒等十八日之役程文炳陣獲賊目陳青沅王大中等又據擒賊供稱賊首李老懷已於陣前伏誅並聞賊自屢挫後倉皇失措一夜數驚其窮憊情形已可想見臣宗棠一俟確探賊蹤卽激勵將士更番疊戰設法兜剿又奏再劉松山郭寶昌兩軍上年十一月間克復陝西綏德州城呈請獎敘出力員弁臣左宗棠因其呈報之日已在賊渡黃河以後當以賊眾渡河未能遏截暫停獎敘查綏德之役在捻逆渡河前十餘日該兩軍奮弁實有微勞且自劉松山

郭寶昌由晉入直屢著戰功劉松山郭寶昌蒙 天恩優敘所部員弁轉戰山西河南直隸三省又已三月可否將該兩軍克復綏德州戰功彙歸入直後各戰先行給予獎敘以資鼓勵劉松山郭寶昌可否賞換清字勇號以示獎勵之處出自恩施又奏各省勇丁口糧舊章多寡不一見在入直正值年荒物貴之時糧食昂貴軍士所領糧餉無多倍形支絀普議增加則於各該省餉章有礙欲置之不論則彼此相形之下未免厚薄攸分再四籌維惟有於皖豫兩軍懸立首級賞格斬逆首級一顆驗明髮長一尺以上者給銀二十兩髮長二三寸以上者給銀五兩近尺者給銀十兩其槍礮彈斃及羣矛攢刺未及割取首級者亦由各將領據實報明臨時議給賞犒銀兩其奪獲羸馬者亦准酌給賞銀藉鼓勵之資爲津貼之費庶可合眾志以賦同仇楚湘淮各軍口糧優厚自不

能以此藉口至逆首張總愚張五黑及賊中各頭一之稍著者生擒陣斬從優懸立賞格則各軍一律無庸區別此項賞犒銀兩應請旨准其作正開銷 上諭軍機大臣等擒逆被各路官軍痛剿折竄狂奔由東南逃向東北復由東北折向西南勢極窮蹙正宜乘此機會力圖聚殲渚沱水勢消長靡定若不乘此水漲之時亟行殄滅設被賊騎搶渡而南蔓延將何底止郭松林楊鼎勳等軍自安平饒陽獲勝後兒在進剿情形如何日久未據李鴻章奏報著卽迅速陳奏左宗棠李鴻章官文務當振奮精神合力同心共圖聚殲之舉不可稍涉延緩致誤機宜丁寶楨亦當於河間西南兩面嚴密防剿與左宗棠李鴻章各營和衷共濟互相聯絡不可稍分畛域皖豫兩省赴直援剿各營勇糧月額較湘淮等軍數少左宗棠擬於皖豫兩營斬獲首級奪獲羸馬加懸賞格藉資津貼

等情均著照所議辦理該大臣隨營餉項不敷著戶部迅撥見銀五萬兩解赴該營應用以濟急需卽由左宗棠隨時籌撥戶部歸款該大臣當趕緊督軍滅賊毋再遷延李鶴年所奏豫軍戰勝情形與左宗棠所奏大略相同牛師韓方長華兩軍分紮楚旺臨漳兩處馬德昭一軍改紮滑濬之交卽著李鶴年飭令嚴密堵禦設遇賊匪搶渡漳沔南竄卽令此起防軍迎頭截擊以杜蔓延陝豫交界處所仍著該撫隨時防範毋稍大意將此由六百里各諭令知之○命抽查漕糧御史嚴查偷漏○戊申諭軍機大臣等英翰奏回潁交卸撫篆並籌豫西防務各摺片前以直隸軍務喫緊豫省兵力較單諭令英翰與李鶴年會籌防剿毋庸回潁交卸茲據英翰奏稱見已回抵潁州交卸撫篆該署撫本月初二日拜發摺件至今二十餘日尙未奉到諭旨等語已命軍機處將二月十四

日寄信諭旨一道另行鈔錄封寄該署撫勇於任事當念直豫交界地方防務正關緊要著卽懷遵前諭剋日折回汴梁督飭牛師韓等軍於臨漳楚旺一帶扼要駐紮並隨時與李鶴年會籌布置相機調度毋稍稽延刻下豫省西路防務較鬆姚廣武等軍計已到豫應否移紮河陝一帶以固邊防之處卽著英翰李鶴年會商辦理將此由五百里各諭令知之○是月獨緩廣東連平等五州縣被擾同治四年額賦